



Uunga siunnersuut: Suliniutini angisuuni illuliortiternernik sanaartornernillu suliassat pillugit inatsisartut inatsisaata allanngortinnissaa pillugu Inatsisartut inatsisaat nr. xx, xx. xx 2019-imeersoq.

(Inuussutissarsiornermut Nukissiuuteqarnermullu Naalakkersuisoq)

(Siullermeerneqarnera)

Kalaallit Nunaat nunarujussuuvoq inukittunnguaq. Taamaattumik ilaannikkut atorfinnut aalajangersimasunut tulluuttunik piginnaanilinnik sulisussarsiniarneq imaannaangissinnaasarpoq. Tamanna nunap ilaani sumiiffinni assigiinngitsuni takornartaanngilaq. Tamanna tunngavigalugu avataaneersunik sulisussarsisarnissarput pinngitsoorsinnaanngilarput.

Tamatta kissaatigaarput nunatta ineriartornissaa aamma nunani allaniittunik suliffinnik ingerlatseqatigiiffinnillu nunasiffigissallugu pilerigineqalernissaa. Aningaasaliissutit avataaneersut nunatsinni inuiaqatigiit aningaasarsiornerannut iluaqusiissaaq taamaasillunilu tamatsinnut.

2000-tikkut ingerlanerini Inatsisartuni ingerlatanut annertuunut inatsit ineriartortipparput, taamani sanaartugassat annertuut pillugit tutsuviginartumik isumaqatigiinniarnertit ingerlanneqarmata, taamanilu sivikitsuinnaap ingerlanerani paasinarsivoq sulisartunik pisariaqartinneqartunik nammineq pilersuisinnaanngitsugut. Ingerlatanut annertuunut inatsimmi malittarisassat atuuttut allaaseraat sanaartornermi aningaasartuutit minnerpaamik 5 milliarder koruuninik naleqartassasut ingerlatatut annertuutut nalilernerqartassappata. Siunnersuummi matumani siunnersuutigineqarpoq aningaasartaliunneqartut 1 milliard koruuninut appartinneqassasoq.

Demokraatini isumaqatigaarput tamanna pissusissamisuussasoq, ingerlatat amerlanerusut ingerlatatut annertuutut taaneqarsinnaanngussammata. Isumaqarpugut aningaasaliisartunut avataaneersunut kajuminnerulersitsisinnaassasoq oqareernitsitit nunatsinnut tamarmut tamanna iluaqusiisussamat.

Taamatut oqaaseqarluta inassutigaarput siunnersuut Sanaartornermut Ataatsimiititaliami suliarineqassasoq.